



Sa Festa de sa Mama

Sa Mama dda afestant gai in totu su mundu, cun una dí in onori de su rolu e de s'importu sotziali chi tenint is mammas. In sa prus parti de is istadus, s'afestamentu est in su mesi de Maju, ma a logus dda afestant in su mesi de Martzu.

Cumentis iscius totus, sa dí dedicata a sa Festa de sa Mama, in Itàlia est su segundu domínigu de Maju.

Custu afestamentu, cumentis ddu connosceus oindí, est nàsciu in sa segundu metadi de is annus '50 in duus ocasionis differentis, una commertziali e una religiosa.

Po su chi pertocat sa festa commertziali, ant cumentzau a dda celebrai in su 1956 in Bordighera, gràtzias a su Síndigu, chi fiat fintzas Senadori – is annus a pustis issu etotu iat fatu una proposta de lèi po fai una festa istitutzionali – e su Presidenti de s'Enti "Fiera del Fiore e della pianta ornamen-

tale di Bordighera - Vallecrosia". Is primmus bortas dda iant afestada in su Teatru Zeni, e a pustis in su Palàtziu de su Parcu.

Imbecis, po su chi pertocat sa chistioni religiosa, sa Mama ant cumentzau a dda afestai s'annu a pustis, in su 1957, gràtzias a Otello Migliosi, predi de Tordibetto de Assisi in Umbria. Issu iat pentzau de afestai sa Mama no isceti po una chistioni sotziali e biològica, ma fintzas e pruscatotu po su valori religiosu e cristianu de custa figura, e cument'e ocasioni de incontru e arrexonu intra culturas diferentis. De intzaras, in sa Parròchia de Tordibetto faint eventus religiosus e culturalis de importu mannu, e in sa biddu ddoi est fintzas su Parcu de sa Mama, s'unicu in totu s'Itàlia, chi at progetau s'architetu Enrico Marcuci acanta de is rastus de sa crésia de Santa Maria di Vico; in su tzentru de su parcu ddoi est s' "istàtua de sa maternidadì" de s'artista Enrico Manfrini.

A pustis, sa Mama ant cumentzau a dda afestai in totu s'Itàlia sa dí de su 8 de Martzu, sa matessi dí dedicada a sa Madonna de Pompei; a partiri de su 2001, s'afestamentu si fait su segundu domínigu de Maju. In custa ocasioni pipias e pipius arregalant a is mamas disínnius e àteras cositeddas chi faint in iscola, e in prus imparant a recitai poesias e versus dedicaus a issas.

E própiu cun una bella poesia chi tenit a títulu "Mama", de Elettra Vidili, nosu de s'Ufítziu Língua Sarda de su Progetu "Sa Marmidda chistionat in Sardu", cun su Comunu de Tuili impari a is Comunas de Barúmini, Gésturi, Is Pratzas, Setzu e Biddanoa Franca, boleus fai is norabbonas a totu is Mamas, e pruscatotu a is Mamas de Sardigna, torrendi-ddis Gràtzias po totu su chi faint e po sa Bellesa e s'Amori chi ispainant in su mundu.

Mama

Aia giai serrau sa janna
pro custa soledade intro 'e su coro,
da' cando m'est mancadu su tesoro
e cun issu sa durche ninna nanna,
chi mi faghiat intendere manna
in custu mundu chentza prus decoro.
Cantu mi ses manchende Tue mama,
como m'agato puru chentza fiama.

Fus s'alluminzu de s'ilgerru meu,
sa lughe de sa mia gioventude,
m'as dadu parte 'e sa tua virtude
e da' Te, apo tentu su recreu,
chentza proare prus nesciunu anneu
ca mi cherias in bona salute.
Mi ses bistada mama e puru amiga
e no amos connotu mai briga.
Depidu as bivere oriolos meda
cun noe fijos tentos a cadena,
chi allevadu as poninde bona lena.

De certu non bestimis cun sa seda
ca fuit paga finas sa moneda
ma non pro cussu mancada est sa chena.
Dadu nos as pius de su ch'as tentu
si puru t'est costadu patimentu.

Fus s'anghelu 'e sa mia pitzinnia
e deo s'anghelu 'e sa tua 'ezzesa;
chi pro nudda at calpidu sa belleza
in sas ultimas dies de agonia,
cando t'est arrivada s'ingannia
e no as tentu peruna difesa.
Faghemi lughe in cust'andala 'e vida
gai chi parza a Tie sempre unida!

Elettra Vidili - Il prémiu Cuncursu San Sperate 2/08/2015

SA MARMIDDA CHISTIONAT IN SARDU - Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.